

**Uunga siunnersuut: Soraarnerussutisiaqarnissamut aaqqissuussinnermut pinngitsoorani  
ilaanissaq pillugu Inatsisartut inatsisaata allanngortinneqarnera pillugu Inatsisartut  
inatsisaat nr. xx, xx. xxx 2019-imeersoq**

*Aningaasaqarnermut Nunanilu Avannarlerni suleqatigiinnermut Naalakkersuisumit  
saqqummiunneqartoq*

**pillugu**

**Aningaasaqarnermut Akileraartarnermullu Ataatsimiititaliap**

**siunnersuutip aappassaaneerpeqarneranut**

**ISUMALIUTISSIISUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Hermann Berthelsen, Siumut, siulittaasoq  
Inatsisartunut ilaasortaq Peter Olsen, Inuit Ataqtigiit, siulittaasup tullia  
Inatsisartunut ilaasortaq Karl Kristian Kruse, Siumut  
Inatsisartunut ilaasortaq Henrik Fleischer, Siumut  
Inatsisartunut ilaasortaq Múte Bourup Egede, Inuit Ataqtigiit  
Inatsisartunut ilaasortaq Jens NapátôK', Partii Naleraq  
Inatsisartunut ilaasortaq Randi V. Evaldsen, Demokraatit

**Siunnersuutip imarisaa siunertaalu**

Inatsisissatut siunnersuummut qulequttap iluarsineqarnerata saniatigut borgmesterinik borgmesterillu tulliinik kiisalu kommunalbestyrelsinut nunaqarfinnilu aqutsisunut ilaasortanik aamma najukkani ataatsimiititaliat ilaasortaannut il. il. akissarsiaqartitsineq pillugu Namminersorlutik Oqartussat nalunaarutaanni nr. 25, 30. december 2013-imeersumi § 2, § 12 aamma § 14 naapertorlugit akissarsiat ilaasortaajunnaarnersuutillu borgmesterinut tunniunneqartut soraarnerussutisiaqalernissamut ileqqaakkanik naatsorsuinnermi tunngavissanut ilaatinneqannginnissat siunnersuutigineqarpoq.

**Siunnersuutip Inatsisartunit siullermeerpeqarnera**

Siunnersuut siullermeerpeqarami tapersorsorneqarluarpoq.

**Ataatsimiititaliap siunnersuummik suliarinninnera**

Borgmesterit assigalugit namminersorlutik inuussutissarsiuteqartut ilaatinneqannginnissaannik kissaateqarneq siullermeerinninnermut atatillugu oqaatigineqartoq ataatsimiititaliamit maluginiarneqarpoq. Namminersorlutik inuussutissarsiuteqartut soraarnerussutisiaqarnissamut aaqqissuussinermut pinngitsoorani ilaaffigisassamut ilaatinneqannginnissaannik kissaateqarluni Sulisitsisut tusarniaanermut atatillugu oqaatigisimasaannik tamanna aallaaveqartoq ataatsimiititaliamit ilimagineqarpoq.

Tamanna pillugu siunnersuummut nassuiaatini Naalakkersuisut ima allapput:

*”Namminersorlutik inuussutissarsiortut amerlasuut soraarnerussutisianut ileqqaagaqalersimasanngillat. Namminersorlutik inuussutissarsiortunut tunngasut akissarsialinnut tunngasut assigeqqissaassanngikkaat, inatsimmi atuuttumi sillimaffigineqarpoq. Namminersorlutik inuussutissarsiortut soraarnerussutisianut aaqqissuussinernut akiliuteqarnissaannik piumasaqaatit taamaalillutik akissarsialinnut atuuttut affaasa missaanniipput.”*

Tamatumunnga nangissutitut ataatsimiititaliamit oqaatigineqassaaq ajornartorsiut taanna 2016-imi inatsisiliornermut atatillugu oqaluuserineqareermat. Inatsit aatsaat 1. januar 2018-imi atuutilerpoq, taamaattumillu inatsisip namminersorlutik inuussutissarsiuteqartut suliffeqarfiutiminni aningaasaliissuteqaqqinnissamut periarfissaannut sunniutai pillugit misilittakkat katersorneqarsimasut assut killeqarput. Taamaattumillu ajornartorsiut taanna eqqumaffigeqqullugu Naalakkersuisut ataatsimiititaliamit kaammattorneqarput, taamaaliornikkut tamanna pisariaqartoq paasinarsissappat akiliutissanut piumasaqaatit iluarsissuteqarfigineqarsinnaaqqullugit.

### **Siunnersuutip aningaasaqarnikkut kingunerisassai**

Tamanna pillugu maleruagassat atuuttut naapertorlugit siunnersuutip aningaasaqarnikkut kingunerisassai siunnersuummut nassuiaatini allaaserineqarsimapput. Tamanna pillugu ataatsimiititaliaq annertunerusumik oqaaseqaatissaqanngilaq.

### **Ataatsimiititaliap inassuteqaatai**

Siunnersuut **akuerineqassasoq** ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

---

Hermann Berthelsen  
siulittaasoq

---

Peter Olsen  
siulittaasup tullia

---

Karl-Kristian Kruse

---

Henrik Fleischer

---

Múte Bourup Egede

---

Randi Verstergaard  
Evaldsen

---

Jens Napaattoq